

**TILSKIPUN FRAMKVÆMDASTJÓRNARINNAR 95/15/EB**

frá 31. maí 1995

**um aðlögun á tilskipun ráðsins 89/647/EBE um eiginfjárhlutfall lánastofnana að því er varðar tæknilega skilgreiningu á „svæði A“ og með hliðsjón af vægi eignaliða sem eru kröfur með beinni ábyrgð Evrópubandalaganna(\*)**

(Texti sem varðar EES)

**FRAMKVÆMDASTJÓRN EVRÓPUBANDALAGANNA HEFUR,**

með hliðsjón af stofnsáttmála Evrópubandalagsins,

með hliðsjón af tilskipun ráðsins 89/647/EBE frá 18. desember 1989 um eiginfjárhlutfall lánastofnana<sup>(1)</sup>, eins og henni var breytt með tilskipun 92/30/EBE <sup>(2)</sup>, einkum 9. gr.,

og að teknu tilliti til eftirfarandi:

Í öðrum undirlið 1. mgr. 2. gr. tilskipunar 89/647/EBE er „svæði A“ skilgreint sem „öll aðildarríki og öll önnur lönd sem eru fullgildir aðilar að Efnahags- og framfarastofnuninni (OECD) og þau lönd sem hafa gert sérstaka lánsamninga við Alþjóðagjaldeyrissjóðinn (IMF) í tengslum við hið almenna lántökufyrirkomulag sjóðsins (GAB)“.

Fram að þessu hefur fullgild aðild að Efnahagssamvinnu- og þróunarstofnuninni (OECD) verið talin hentugasta viðmiðunin til að greina lánsáhættu milli landa með hliðsjón af vægi eignaliða sem fela í sér kröfur á eða eru með beinni ábyrgð þessara landa.

Fullgildum aðilum að Efnahagssamvinnu- og þróunarstofnuninni fjölga um þessar mundir þar sem önnur lönd hafa náð hærra þróunarstigi auk þess sem lýðræðislegt og efnahagslegt frelsi hefur aukist í samræmi við almennar meginreglur um aðild að stofnuninni.

Út frá varfærnisjónarmiði er mikilvægt að viðhalda lánstrausti allra landa sem flokkast undir „svæði A“. Af þessum sökum ber að bæta nýrri viðmiðun við skilgreininguna á „svæði A“. Í þessari viðmiðun skal felast að hvert það land sem umbreytir erlendum ríkisskuldum skal útilokað frá „svæði A“ í fimm ár. Sama viðbótarviðmiðunin hefur verið tekin upp í Basel-samkomulaginu um fjármagn og æskilegt er að samræmis sé gætt við þetta samkomulag.

(\*) Þessi EB-gerð, sem birtist í Stjtið. EB nr. L 125, 8. 6. 1995, bls. 23, var nefnd í ákvörðun sameiginlegu EES-nefndarinnar nr. 69/95 frá 15. desember 1995 um breytingu á IX. viðauka (Fjármálaþjónusta) við EES-samninginn, sjá þessa útgáfu af EES-viðbæti við Stjórnartíðindi Evrópubandalagsins.

(<sup>1</sup>) Stjtið. EB nr. L 386, 30. 12. 1989, bls. 14.

(<sup>2</sup>) Stjtið. EB nr. L 110, 28. 4. 1992, bls. 52.

Í öðrum undirlið 1. mgr. 9. gr. tilskipunar 89/647/EBE er kveðið á um að tæknilegar breytingar sem varða skilgreininguna á „svæði A“ í 2. gr. skuli fara fram með þeim hætti sem mælt er fyrir um í 2. mgr. 9. gr.

Þegar tilskipun 89/647/EBE var samþykkt var ekki gert ráð fyrir þeim möguleika að lán gætu verið með beinni ábyrgð Evrópubandalaganna. Þar af leiðandi var ekki beinlínis kveðið á um lægra vægi í tilskipuninni og því er vægi eignaliða sem Evrópubandalögin ábyrgjast látið vera 100% eins og sakir standa.

Í 3. og 7. tölul. a-liðar 1. mgr. 6. gr. tilskipunar 89/647/EBE er núllvægi hins vegar látið gilda um eignaliði sem fela í sér kröfur á Evrópubandalögin og eignaliði sem eru tryggðir á fullnægjandi hátt að dómi lögbærra yfirvalda með verðbréfum sem eru gefin út af Evrópubandalögunum.

Ekki er við hæfi að láta 100% vægi gilda um eignaliði sem eru með beinni ábyrgð Evrópubandalaganna og því ber að láta núllvægi gilda um þá til að tryggja samhliðan við 3. og 7. tölul. a-liðar 1. mgr. 6. gr.

Í fjórða undirlið 1. mgr. 9. gr. tilskipunar 89/647/EBE er kveðið á um að tæknilegar breytingar, sem ganga út á það að breyta skilgreiningunum á eignum sem frá er greint í 6. gr. til að taka megi tillit til framvindu á fjármálamörkuðum, skuli fara fram með þeim hætti sem mælt er fyrir um í 2. mgr. 9. gr.

Þessi tilskipun varðar Evrópska efnahagssvæðið (EES) og málsmeðferðinni sem mælt er fyrir um í 99. gr. samningsins um Evrópska efnahagssvæðið hefur verið fylgt.

Ráðstafanirnar sem kveðið er á um í þessari tilskipun eru í samræmi við álit ráðgjafarnefndarinnar um bankamál.

**SAMÞYKKT TILSKIPUN ÞESSA:****1. gr.**

Við annan undirlið í 1. mgr. 2. gr. tilskipunar 89/647/EBE bætist eftirfarandi málsliður:

„Hvert það land sem umbreytir erlendum ríkisskuldum sínum er þó útilokað frá „svæði A“ í fimm ár.“

**2. gr.**

Í stað 4. tölul. í a-lið 1. mgr. 6. gr. tilskipunar 89/647/EBE komi eftirfarandi:

„4. eignaliðir sem fela í sér kröfur með beinni ábyrgð ríkisstjórna og seðlabanka á „svæði A“ eða Evrópubandalaganna,“.

**3. gr.**

1. Aðildarríkin skulu samþykkja nauðsynleg lög og stjórnslufyrirmæli til að fara að 1. gr. tilskipunar þessarar eigi síðar en 30. september 1995. Þau skulu tilkynna það framkvæmdastjórninni þegar í stað.

Þegar aðildarríkin samþykkja þessi ákvæði skal vera í þeim tilvísun í þessa tilskipun eða þeim fylgja slík tilvísun þegar

þau verða birt opinberlega. Aðildarríkin skulu setja nánari reglur um slíka tilvísun.

2. Aðildarríkin skulu upplýsa framkvæmdastjórnina þegar í stað um ráðstafanir sem eru gerðar samkvæmt 2. gr. þessarar tilskipunar.

**4. gr.**

Tilskipun þessi öðlast gildi á tuttugusta degi frá því að hún birtist í Stjórnartíðindum Evrópubandalaganna.

**5. gr.**

Tilskipun þessari er beint til aðildarríkjanna.

Gjört í Brussel 31. maí 1995.

Fyrir hönd framkvæmdastjórnarinnar,

**Mario MONTI**

framkvæmdastjóri.